

四庫全書

集部

欽定四庫全書

梅溪後集卷七

宋 王十朋 撰

詩

赴召

壬午六月十一日上受禪二十一日有旨
除臣某知嚴州九月二十一日召赴行在

聖主龍飛纔十日
微臣得郡古嚴陵
詔書又趣歸天闕
願竭孤忠贊中興

曹夢良贈炭戲成一絕

予時為郎夢良
為嚴州司戶

烏龍書至送烏薪郎舍嚴冬覺有春未暇吞為啞口漢
且須暖作直身人

宿學呈同官

時為司業
宿學私試

不聽梧桐雨回頭已六年
齏鹽諳舊味燈火結前緣
進學思韓愈同襟有鄭虔
諸生不待勸忠孝素惓惓

某去五月罷館職還鄉塗中以詩寄同舍云去
國懷明主離羣念舊遊
翻令到家夢中夜繞瀛洲
今以史職復至道山訪舊或遷或去惟後園

脩竹乃故人也感歎良久因成短篇

蓬萊隔弱水三年兩來遊羣仙各何之翩然蛻神洲園
中舊籜龍勁節含清幽手摘歲寒葉恍惚無歸舟

馮負仲赴闕奏事士君子咸欲其留聞為魏公
所辟勢不可奪遂成鄙語兼簡查元章

名德重華夏皇朝兩魏公平淮已得愈論將更資馮報
主男兒志知恩國士風盡收良馬去冀北遂羣空

予嘗以書

寄馮云聞元章為魏公所知裴度幕中得韓退之賊不足平矣元章時為機宜負仲為江西運判召來奏事

程泰之郎中以詩三絕覓省中梅花因次其韵
長記蓬山舊賞梅芳尊一笑共君開重遊未見梅花面
應誤君詩得得來

詩似西湖處士詩十篇三絕閭清奇更將正味森嚴句

壓倒屋簷斜入枝

程未篇云花中結子酸連骨正味森嚴衆苦之待得和羹渠自會如今莫

管皺人眉

竹亭不到幾經時來往逢梅似退之遙想吾廬溪上好
十分鄉思又關眉

胡秘監贈詩一絕

司業口占絕句奇甚銓輒用韻和呈效吳體

南山舊說王隱者北斗今看韓退之不須覓句花照
眼行見調羹酸着枝

某依韻奉酬

平生恨未識剛者今日豈期親見之欲把江梅比孤潔

江梅無此歲寒枝

時胡丈同館中諸公見訪因畱小酌
予舉和程泰之梅詩壓到屋簷斜入

枝句胡頗稱賞
和枝字韻以贈

胡秘監醖醖詩

銓携具賞石渠醖醖用坡韻呈同舍

醖醖獨殿春得路未為晚露葉張翠繖月蒞明玉幌
洗粧雨亦妍暗麝風更遠唐時真宰相勁氣凌諫苑
危言工切劇壁立萬仞懾帝為釀此花以賞碩畫婉
清芬濯千古天河豈須輓不妨便醉死聞香定魂返

唐憲宗以李絳直言賜醖
醖酒未若此集真醖醖也

某次韻

秘監攜具道山集羣仙賞醪醑和東坡詩真雅會也
某偶以私試鎖宿不與遂次其韵

紅紫紛爭先醪醑分甘晚誰裁羣玉府童童張翠幃華

共芸芬香韵随官逸遠

館中醪醑在著廷之後著作郎號逸遠官

奚用燃青

藜端能照書苑先生海上歸平步到蓬巖招邀飲醪耐
剛腸出清婉遙思吳宮魂故作楚辭挽勿為花所留興
盡要知返

館中三月晦日聞鶯胡邦衡有詩用東坡醪醑

韵有君側無讒人發口不須婉句某次韵

久傷伐木廢每歎吾生晚黃鳥從何來喬林綠垂幃忽
作相呼聲朋來無近遠高翥凌雲烟斜飛集池苑中有
幽谷姿遲遲下遙巘羣音巧相和出語獨不婉啞啞如
老烏聞者弓欲挽知心有杜鵑勸爾故園返

上賜講讀官建茶某以說書與焉以十餅分贈

太學同舍芮太博

煇

有詩次韵

天表初容咫尺親雲龍重拜大官珍賜從明主恩尤渥

分及清流事更新搜卷要須嘗七椀乘風便合到三神
諸公異日沾君貺願寄江湖老散人

四月從駕詣德壽宮與諸公會食于和樂樓是

日借洪景嚴承旨馬戲云從駕濫騎承旨馬朝

天叨綴舍人班

時為起居舍人

異日再集胡舍人邦衡

云不可不成篇也遂於櫺中足之

殿坳經幄侍清閒學術空疎媿在顏從駕濫騎承旨馬
朝天叨綴舍人班登樓雖喜民和樂論事還驚世險艱

聖主英姿同藝祖諸君何苦戀湖山

時議欲乞移蹕建康侍從諸公有異

論者故云

用登和樂樓韵酬胡邦衡送別兼簡劉韶美秘

監

未訪鄱陽范與顏

顏魯公范文正公俱守鄱陽

雁山深處且投閒紫

泥長記曾同召丹陛何繇更對班我媿未行平日志公

應不創昔時艱筆端能制人生死兼有劉郎在道山予與

邦衡韶美嘗同為編脩官予既入臺即罷吏職而二公如故

去國

六月十九日

去國常憂國還家未有家

先人弊廬為風雨所壞

君恩報無所舍

媿出京華

重遊釣臺

三年兩浙釣灘濤來往何曾補一毫聖主雅恢光武量

微臣當遂子陵高

弭棹祠堂下一天星斗明客星尋不見影浸釣灘清

過發女同年王節推夷仲黃教授

萬頃

鄉人華

主簿子周會飲雙溪樓

年時嘗泛婺溪舟未上清風八詠樓天為故人償夙願
辛巳五月至婺溪夷仲諸同年有登樓之約忽聞欽宗諱遂止水知吾輩喜清流沈郎
不為吟詩瘦王粲長懷去國憂明日山川共人遠鄉情
年契兩悠悠

遊仙都

皇都歸客過仙都厭看西湖看鼎湖洞接龍泓片雲近
有龍泓洞山分雁蕩一峰孤
有石柱壁立如雁蕩天柱峰香清天上碧華

落音好林間青鳥呼天遣林泉慰吾輩不容身世老迷塗

游洞谿

舊名惡溪因段成式改名好溪有唐太守李君卿十詩有亭名思賢

段公不到溪豈好李守已亡詩更奇偶向思賢亭上坐
愛溪兼愛昔人詩

重遊石門洞

石洞幾時闢石門長不扃貪看一派水三載兩回經
誰把銀河水直從天半傾好流人世去一洗四維清

寄題喻叔奇亦好園

喻子有園堪養親栽花種竹清且新堂中戲罷即策杖

叔奇有母家有戲綵堂在家有此何憂貧弟兄既好園亦好叔奇與兄

伯壽同登科大勝吾家園小小兩園松竹懷主人他日歸來

各須早

種蔬

癸未孟秋歸自武林小小園荒蕪之甚遂課僮僕畦
以植蔬近得微雨頗有生意潛澗老叔分蔥蘢數十

本及菜子一二種今冬百指可以無饑矣書十五韵

歸來日彈鋏食無肉與魚却將種花地町畦毓嘉蔬驕

陽每把甕時雨親荷鋤青青有生意令我顏色舒寧憂

饑與飢亦有瓶中儲前身老闍梨

或云予前身嚴闍梨也因以戲示蔬

氣端未除文字亦宿業復生魚蠹書蠹書仍食蔬苦淡

味有餘况茲清淨根分來自僧居端能納須彌聊爾秀

郊墟洗我腥羶腸

退之詩云聲名暫羶鄉非止為魚肉也

襟宇生清虛豈

惟陶淵明吾亦愛吾廬荒園涉成趣枯藤當安輿困枕

案頭卷飢著盤中菹孔門陳蔡色借問何如予

予素不善棊孫光覺萬大年林大和見訪戲與
對壘偶皆勝之因作數語

予手不善談臨局氣先怯偶逢孫萬林三戰輒三捉都
緣敵不勁非以臺威脅孺子濫成名凱奏意殊愜三君

皆壯士小挫未肯厭予今務持勝堅壁不容劫予昔在館中每

與同舍郎陳阜卿手談既而陳還臺察一日相與棊諸
公戲云陳今有臺威公必敗予偶勝之陳笑曰公果不

畏臺
威耶

大年和慕詩復次前韵

君慕如龍且初笑韓信怯我慕似公瑾赤壁真橫捷但
知貪旁角不覺攻背脇主人本無競勝負兩俱愜嘉賓
儻再集鏖戰定誰厭新篇尤逼人我輩徒劫劫

太白晝見

太白晝見久矣予是日始
親見之八月二十六日

煌煌太白生東方追逐殘月生光芒太陽中天不肯藏
過午一點猶微茫太史占之此何祥咸憂兵起人流亡
金行用事多灾傷

六月十五日大風水七月朔日又作
八月二十一夜地震是秋七月不雨

浙西飛蝗蔽天

大風地震水旱蝗有一于此宜預防雖然並見

何以當臣言天意未可量滔天赤地興堯湯偃禾拔木

悟成王宋景一言國乃昌災異不作憂楚莊吾皇修德

應彼蒼去讒遠佞任忠良推誠納諫正紀綱內修政事

仍外攘誓雪國恥還封疆強敵當弱吾當強

天文志太白與日爭

明強國弱國強

天戒為福非為殃願勿徒以虛文襮

荆婦夜績

涼飆墮黃葉促織催女工鬢絲不堪織細君哀我窮青

燈續深夜續成寒素風願為隱者衣德耀隨梁鴻

術者謂予命犯元辰故每仕輒已予笑曰有是
哉戲作問答語

問君胡為入臺省問君胡為官輒冷宣尼猶且畏元辰
羊鼠龍猪作君梗退之宿直斗牛箕聲名謗毀常相隨
死生窮達端有命予知之矣當安之

再至雙植堂呈表兄李克明

此日一樽酒再遊雙植堂湖山浮野色草木帶秋光東

道德已熟西風老更香相看俱老矣會合意尤長

九日寄表叔賈司理并引

某昔從潘先生學九日登鹿迹岩嘗賦詩呈諸長者
時年十七今閱三紀矣當時和者賈太孺潘先生劉
謙仲覺閣梨皆一時詩人也某猶能記其略數老人
化去久矣思之慨然司理丈鹿岩賢主人也佳節必
盛集某恨不獲奉樽俎輒成古詩十韵以記舊事并
以蒙泉酒鳳團茶為壽

憶昔從師學絃誦年與賈生相伯仲

某時與諸賈昆季遊皆年少也九

日登高鹿岩脊感物題詩筆初弄舊遊回首半零落三

十六年真一夢當時唱和三四老尚有殘篇可吟諷今

年節物身在家行樂山間謾隨衆弟兄勸我登高山身

似騫駘不容鞚

兄弟鄰里欲同登高某以時多凶荒災異及賤軀多病止之

河東先

生今靖節有酒寧須白衣送朋尊聊獻菲蒙泉

近日蒙泉酒不

佳越有菲泉最下品酒也可以菲蒙泉名之

賜茗仍分小團鳳願公一飲壽

千齡三物年敢馳貢

九日不登高與兄弟鄰里就敝舍飲菊

中秋對明月

中秋亦就家賞月

九日逢黃花節物豈不好而况

身在家樽酒釀鄰里盤飧魚鰕何必登高山清歡自無涯

仙居陳少曾寄錦石杯書至乃九日也方與坐客把菊遂用以勸酒

九日登臨有雁來書傳坐上手親開呼兒滿酌黃花酒
為子深傾錦石杯

僕夫浚井得雙鯽一鰻未及烹也藏之泥水間
予見而放之因作數語

三秋不雨泉脈枯僕夫浚井欣得魚刀砧已具未及殺
我偶見之魚再活親投不敢使校人圍圉洋洋生意新
莫嫌井小思滄海尺水相忘聊自在

得張大猷尚書書云比每進對屢以侍御為言
而邦衡舍人言尤數切

云

某為羣邪所疾獨

見知二公因讀邦衡和樂樓詩復用前韵

一月霜臺屢犯顏未回天聽已身閒
愛君憂國寸心赤感物傷時雙鬢斑
文舉才疎意徒廣子雲思苦語尤艱
尚書左史雖知我超海應難挾太山

次韵題寶印叔蘭若堂

何處名蘭若依山結草堂
花枝法雨潤心地佛燈光浮
世囂塵隔空門歲月長
林間有啼鳥聽法亦來翔

藤杖

頭角槎牙萬歲藤
徧身節目更稜稜
山僧贈我非無意

要我清閒亦似僧

予還自武林葺先人敝廬淨掃一室晨起焚香
讀書於其間興至賦詩客來飲酒啜茶或奕碁
為戲藏書數百卷手自暴之有小園時策杖以
游時遇秋旱驅家僮浚井汲水澆花良天佳月
與兄弟鄰里把酒盃同賞過重九方見菊以泛
觴有足樂者每覽鏡見蒼顏白髮亦聊自歎也
作小詩十五首

掃室

洒掃學者事陳蕃胡不然要令天下淨端自室中先

焚香

掃地眼塵淨焚香心境清紫頭時一炷邪慮不應生

讀書

入政慚無學還家更讀書翻同小兒輩相共惜居諸

賦詩

秋興最難遣詩懷如亂雲雖無少陵筆一飯不忘君

飲酒

我意豈在酒銜盃聊樂天客來同一醉客去獨高眠

啜茶

濫與金華講賜沾龍鳳團却歸林下飲更媿是麕官

奕碁

光景老尤惜忍銷枰奕間娛賓久絲竹一局戰清閒

暴書

秋日更可畏所宜惟暴書反身還自笑均是蠹書魚

策杖

園小日思涉山高時欲登老來疲脚力興至策枯藤

汲水

汲井得鰻放之明日水漲而清僕夫云鰻能穿石眼通泉脈故戲及之

山中久不雨汲水欲何從一夜井泉達靈鰻恐是龍

澆花

花木正憔悴秋陽那更驕驅童綆深井聊助化工澆

賞月

還舍八十日三逢明月圓停盃試一問歸去定何年

采菊

既晚開何益采之聊泛觴書生自頭白奚用泣馨香

覽鏡

可正宜頻覽無塵亦自磨少陵今老矣功業欲如何

浚井

旱久井垂涸汲多泉更渾浚教泥淨盡何患不逢原

酬林明仲寄書并長篇

名季任

江頭一別九十日路隔烟波望欲迷風送鴈羣來鴈蕩

書從梅嶼到梅溪
羨君筆力能豪健
贈我詩篇過品題
謝客江山富觀覽
城南何日手重攜

昌齡欲遊白石興盡而止予亦思前年之遊遂
次其韵

前年蠟屐遠尋幽
洞府曾經一宿留
詩句親題碧雲裏
夢魂時到白岩頭
風生見說欲飛去
興盡何如且罷休
他日相呼老兄弟
飄然杖屨共翱遊

洪丞不負軒

坐此軒無媿問君何以能所行皆是學不負豈惟丞鳧
驚文書靜槐松詩思凝博陵徒種績踐履亦何曾

周丞奉挽詩

同年周敏卿父

平生義方教真是起家媒有子願已足無心官自來興
隨鳩杖逸情為雁行哀想見長塘水淒涼遶夜臺

黃岩趙十朋賢士也有詩云四枚豚犬教知書
二項良田儘有餘魯酒三盃蒸一局客來渾不
問親疎予亦有東臯二項兩子皆學讀書客至

則奕棊飲酒遂用趙君詩意成一絕

薄有田園種斗升
兩兒傳授讀書燈
客來一局三杯酒
王十朋如趙十朋

陳商英挽詞

貴似金張富石崇
紛紜老死利名中
退居不見香山老
肥遁誰知秀野翁

商英號秀野翁

溪上園因種花闌
牀頭金為

好賓空潯然痛念公
兄弟二十年前筆硯同

陳商霖挽詞

疇昔遊從分不輕十年鄉校讀書燈德星會聚三兄弟

詩社追隨八友朋

昔在招仙館有八叟之號商霖號可叟

去國悲涼老王

祭還鄉牢落失陳登誦君生死炎涼句斜日寒天涕滿

膺

商霖嘗有詩云生死交情誰念舊炎涼世態競迎新

萬清之有詩三絕呈司理賈丈并簡某因次其

韻

燈花端為故人然留客殷勤為擊鮮更覺門闌增喜氣

冰清玉潤兩俱賢

清之司理婿也

世路塵埃逐日生
鹿岩高卧自風清
吾皇有詔求遺逸
行見臨雍拜老更

甘言恥效蜜翁逆
耳空餘剛畝忠
願子他年似房杜
好將一語記文中

再用前韵

論文尊酒意歡然
蠟炬高烧夜色鮮
得壻端同權相國
傳經更似老韋賢

右呈司理

僚壻欣逢舊友生人如王謝氣尤清十年前已心相許
細看新詩貌愈更

右酬清之

士論鄉評重乃翁賢如孤突教兒忠治安策就君宜獻
宣室開時夜正中

右贈大老

司理子

未臘而雪豐年兆也大老有詩次韵

明年禾黍定千鍾瑞雪攬先舞曉風更願平淮捷書至

西平擒賊獻司空

主人開燕倒金鍾坐客俱吟柳絮風應念人間有貧者
爐星撥盡酒瓶空

雪中寄梅花與清之大老

天花除惱臘前雪香蘂報春溪上梅分贈鹿岩龍穴友
異時俱是百花魁

題夢齡五桂堂

我昔曾裁會趣堂子今封植更芬芳勝它福峙三珠樹

賽却東嘉五馬坊

永嘉王氏雙桂
正在五馬坊

靖節柳青寧耐久大

夫松老恨無香何如移得蟾宮種不媿靈椿竇十郎

寄鯉魚與萬大年

江楓搖落江梅破江上詩人有佳句欲於龍穴覓明珠

試遣鯉魚傳尺素

梁府君挽詩

麗水人子
安世登科

兩郡三鄉賴保全乃翁劍學不虛傳黃巢詎敢臣周朴
趙勝那能爵魯連仁里化成儒氣象心田種得佛因緣

奇兒自是青雲士行見榮光燭九泉

永嘉盧仲脩永年袖文見訪酬以短句

地僻原名左天寒歲欲徂遙遙屈佳客得得訪潛夫一

第且恩子八篇真起予

有論八篇

蜚聲參四傑誰復敢前盧

林明仲和詩復用前韵

屢戰夷吾卒霸齊棘棲鸞鳳暫沈迷探春想見登梅嶼
乘興何妨泛雪溪樓上清歡庾公興橋間壯志馬卿題
四場筆力媒身策平步青雲豈待攜

張器先和詩復用前韵

心欲齊賢媿未齊
遠蒙佳句警昏迷
音如鼓瑟鏗清廟
味似煎茶闔建溪
憂國非同長卿病
感時端賴少陵題
二松豈是淹賢地
鳬鶩文書謾挹攜

寄蒲墨與明仲

四友共文房
蒲君最異常
研磨發文采
好去奉仇香

寄沈敦謨

名希臯
瑞安人

二十年前舊友生
緘封遠寄見交情
舊遊回首多零落

大器如君合晚成

送謝任之

七歲吾從乃祖遊童蒙深愧未能求堪嗟四十五年事
昔未裹頭今白頭

梅溪闢館子來遊回首如今二十秋端似韓張互傳授
要令編刻紹箕裘

去年還家已半年盍簪尊酒數留連歲窮送別溪頭路
手把梅花思黯然

題雙瀑

女媧石爛幾經脩天漏猶餘兩派流
離合無心元不靜
朝宗得路却相投
干雲寶劍真同氣
出蕩神龍不異秋

雁蕩有大
小二龍湫

何用築門防俗駕
林泉自是少人遊

雙瀑亭
壞久矣

洪丞命工起廢氣象一新且
欲築門以防俗駕故及之

癸未守歲

歲宜鄉里守杯共
弟兄衛明日人相問
行年五十三

張器先復和詩作五言以寄

短棹別孤嶼故山歸左原遙煩雁足字重到崔羅門歲
月添新老文章憶舊論見詩如見面氣象有餘溫

萬孝全贈金華洞石名雪洒遙峰作進退詩次
韻

天闕金華一洞奇洞中石是化羊遺渾疑雪向閩山落
更訝峰從天竺飛谿上又添乘棹興案頭如照讀書時
故人重我膏肓疾田不荒蕪應亦歸

元宵鄰里攜具就弊舍張燈辭之不獲因成一

絕

凶年猶幸在家鄉鄰里相過具豆觴我輩忍將燈照眼
游人多是火燒腸

祈雨不應

歉歲還鄉益困窮瓶無儲粟酒尊空醉經且學文中子
閔雨難祈應上公

自秋七月不雨至于春二月十九日僅得雨昌
齡作賀詩予未及和而雨止矣遂次韵以閔之

水旱年年費請求仰勤湯禱與堯疇何時三十六雨足
當宁免懷雲漢憂

一杯未吸甕頭春

初欲率飲賀雨以晴遂止

三疊聊歌雨裏塵不用

遽興風伯訟弘羊真是可烹人

社日喜雨復用前韵

社日簷間不斷流淵明欣欲事西疇願言一飽均黎庶
瓶粟無儲不用憂

欲放乾坤萬里春要須先洗庾公塵朝紳賀雨詩多少

誰是詩中諷諫人

家食遇歉有飯不足之憂妻孥相勉以固窮因
錄其語

淵明事高尚瓶中缺儲粟魯公凜名節乞米給饘粥廣
文富才名官冷飯不足少陵老風騷橡栗拾山谷嗟予
何為者處世真碌碌謀生一何拙甌石無儲蓄三年兩
去國囊橐罄水陸還家索租苗不了臘與伏前秋遭颶
風摧折數間屋今年丁大侵破甑塵可掬絕糧瘦百指

告糴走羣僕鄉鄰苟不揀定恐填溝瀆家藏千卷書父
子忍飢讀一字不堪煮何以充吾腹細君笑謂我子命
難食肉去歲官臺省僥倖食君祿有口不三緘月奏知
幾牘聖主倘不容寧免遠竄逐歸來固已幸富貴非爾
福東臯二頃田得雨尚可穀子耕我當耘固窮待秋熟
聞小使胡昉抗金不屈上甚嘉之有旨命右揆
撫師仍有和不可成之語皆出睿斷宗社之福
也昌齡有詩次韵

用儒端可復侵疆
活國何勞別取方
文帝要須親御馬
子卿寧患遠看羊
撫師暫屈黃扉老
論將寧咨白首郎
行見車書混天下
豈容南北分三光

昌齡四月十九日得男請名於予命之曰遲

端似中山夢得詩
海中仙果子生遲
况當首夏清和候

更遇千秋啓建時

是日啓建
天中節

祝爾願同彭祖壽
命名聊

效小蘓兒


蘓黃門子由子名
曰遲其後最盛

吾家種德已數世
庭戶合

生蘭與芝

山丹花

四月相將莫山丹開始都真心本來赤正色自然朱百
合晚仍俗石榴繁更麗誰將仙竈藥花裡着工夫



梅溪後集卷七

欽定四庫全書

集部

梅溪後集卷八

十至

詳校官庶吉士

臣翁樹培

主事臣呂雲棟覆勘

總校官進士

臣朱鈐

校對官中書

臣高中

謄錄監生

臣

陳文斗

欽定四庫全書

梅溪後集卷八

宋 王十朋 撰

詩

七月三日至鄱陽

我來鄱君山水州山水入眼常遲留絕境遙通雲錦洞

安仁縣有絕境亭雲錦水

清音下瞰琵琶洲

餘干縣有清音堂琵琶洲

於越亭前

晚風起湖入鄱陽三百里曉來一雨洗新秋身在江東

畫圖裏

次韵何憲子應喜雨

亢陽誰謂不為灾，飢饉連年甑有埃。
旱魃忽隨冤獄散，雨師遙逐使車來。
平反盡欲歸中典，調燮端宜位上台。

更喜詩如杜陵老，江流坐穩興悠哉。

某至郡而雨何憲詩云人間正作雲

霓望天半忽驚霖雨來

登綺霞亭用喜雨韵

六月西征遇旱灾，脩途千里踏塵埃。
雷公俄喚阿香去，

霖雨便隨流火來
天入滄浪遊楚越
雲翻擺極憶溫台
綺霞亭上一回首
滿目湖山壯矣哉

追和范文正公鄱陽詩

郡齋即事

理郡端如理亂絲
范公往矣欲誰師
典刑猶有堂中像
光艷長存壁上詩
未報國恩嗟老去
不逢人傑恨生遲
一尊坐對鄱江月
耿耿忠懷祇自知

游芝山寺

出郭上崔嵬山川亦壯哉三芝誰采去五老欲飛來懷
古情無盡思鄉首屢回論文一尊酒天色為吾開

登綺霞亭用碧雲軒韵

郡亭臨大澤霞障截塵紛有色祇因日無心元是雲滄
浪隨郭轉欸乃隔江聞文正已仙去佳名千載芬

亭乃
文正

公名

降聖節詣天慶觀因謁顏魯公范文正公祠堂

用贈御賜名道士韵

顏范遙同異代心琳宮香火道緣深詩家風味今誰在
定訪彌明與共吟

觀文正像用贈傳神道士韵

天然形貌寫何難難得靈臺上筆端朋黨論興三黜日
不知誰作正人看

移竹植郡齋之東用懷慶翔堂韵

手移脩竹傍牆栽老眼青青為竹開獨坐書龕誰是伴
清風時作故人来

十月望日同官會飯薦福送酒

鄱水同僚總不羣
公餘相與共論文
遠公蓮社恐無酒
輒效江州王使君

生日示聞詩聞禮

哀哀父母生我勞
生日不見徒悲號
今年偶然夢三刀
二千石向鄱陽
叨身雖五馬已二毛
烹羊擊鮮斫蟹螯
殷勤為壽勞爾曹
願爾他年著綵袍
二親無恙年俱高
更與諸孫持壽醪
滿堂賓客來英豪
會看醉臉如仙桃

木蘊之即席和文字韵酬以二絕

少年才氣已超羣
場屋能搗錦繡文
糠粃在前真有愧
春風得意豈如君

回頭遙念舊時羣
把酒欣論坐上文
臭味聊將比兄弟
大馮君與小馮君

觀郡守題名再書一絕

濫與江湖岳牧羣
於中竄愛范希文
人才相遠心相似
均是憂時與愛君

項服善知縣和詩酬以三絕并簡林致一教授
膽落庭中雁驚羣寧容摘紙舞微文鄱陽賢令知多少
惟有鄱君與項君

收養功成鮮敗羣絃歌聲裏出詩文只愁桃李春風近
卧轍無由駐令君

無錢令尹陶彭澤有道先生鄭廣文預約它年還故里

共騎白鹿效文君

樂清乃張文君騎
白鹿飛仙之地

題薦福寺莫莫堂

休休有室宜歸早莫莫名堂去恨遲禪老相逢應笑我

休休莫莫定何時

家有休休堂

哭馮負仲

一代奇男子哀哉命止斯共天終不忍蹈海亦何辭下
意已三黜照鄰俄五悲煩言何足辨公論不容欺

身為多才誤朝無一日安寧為獨醒鬼不作附炎官夢

斷吳江冷魂歸蜀道難郡齋揮老淚重取近書看

近得負仲

過江
州書

陸居士挽詩

撫州人有子六人
子九齡在太學

槐市訪同舍麟經推何戎傳家知有子種德本由公遺
訓皆新語多男類陸終佳城在何處楚尾白雲中

洪帥陳阜卿寄筍

均是蓬山逸遠官夢中猶問竹平安籜龍寄我知君意
要使剛腸飽歲寒

次韵何子應題不欺室

公如憂國房玄齡我如鄭公思批鱗隆興天下同貞觀

願為賢相為良臣我去公來不同日各展忠懷對宣室
江湖邂逅論赤心更約聯翩書史筆坤爻敬義誠君子
可惜作銘人已死八十四字騰光芒便是千年不欺史

張魏公
作銘

郡丞對雪

平生為雪牽詩興今日無詩奈雪何
淨几翻書擁爐讀
冷坐呵硯帶冰磨
寒江獨釣句思柳銀海光搖人憶坡
欲兩三杯賀豐歲却憂疆場正干戈

子應和詩再用前韵

江東臆雪為誰多清逼官梅興動何堂坐玉芝勞想像

州宅有玉芝堂

句工冰柱老研磨賡酬往事思蓬島

辛巳春日館中賡和

竄

灾異狂言忤諫坡

是歲上元雷雪併作某嘗論灾異諫坡不悅

聽取金華

新號令要須白戰不持戈

祠顏范二公

鄱江善政九賢人文正文忠更絕倫桃李舊邦千里愛
丹青遺像兩朝臣不同赤土祠劉阮端勝睢陽廟遠巡

安得神仙返魂藥九原喚起靜遑塵

題何子應金華書院圖

君不見杜陵野客老更狂浣花溪上結草堂又不見謫
仙世人皆欲殺匡山讀書頭如雪二公同時鳴有唐文
章萬丈光燄長鈞天無人帝呼去草堂書館今荒涼太
平宰相張居士外甥似舅金華子胸中萬卷杜陵翁筆
下千篇謫仙李向來衣冠拜偽楚我乃宋臣惟有死何
曾着眼癡宰相况肯低頭驄御史天邊卿月落九疑口

誦離騷弔湘水誅茅築室小東山天下蒼生望公起種

梅志欲調商鼎持斧夢刀聊爾耳公生長安我東嘉天

遣邂逅鄱江涯筆頭一語真戲劇却將鉄面擬金華

子應

和顧范祠堂詩云鉄面金華誰氏子要須相與嗣前塵

金華自是金閨彦金口褒

揚兩朝眷未須歸去金華山行將入侍金華殿

閏月三白三首

閏月生明後

初四日雪作

江天未臘時風翻禹門浪花糝月

宮枝

桂花一秋三放

照夜皎珠樹秀庭祥玉芝定知年大有何

止麥相宜

迎臘雪三白未春花萬株
神山森玉府天象祭台符
詞吐水流峽鼎成風擊湖
鬢邊絲可織四皓盍添吾

占盡一陽月分為六出時

自初四雪初八又雪二十五又雪

韋編照清

夜塞管落南枝獻中荆山玉
開成廟柱芝

杜詩瑞芝產廟柱註云肅

宗時廟柱產三玉芝

人間瑞已定過此却非宜

又和項服善二首

風雲頻慘淡草木屢蒼顏
詩裡報瓊玖宮中歸玉環

楊妃

凡三帝庭侯帛至佛殿寶珠還更有人清白鄱陽似魯
山

梅蕊開仍落同雲合未離添為五大老真是四無私天
女來成祭冰蠶老欲絲梨花一枝雨冷艷可能欺

又用時字韵

黃竹成章日陽春衆和時玉階談戰陣瓊燕賜花枝陶
徑還飛絮商山欠採芝西疇農事及歸去正吾宜

和洪景廬用三白韵作四白詩

大似佛世界端如玉燭時穆家兄弟味楊氏子孫枝

楊震

四世為公以清白名家

鄧海明瑤柱

四明出江瑤柱

鄒亭望秀芝

鄒江有四望亭

北望芝山州宅有芝秀閣

祁寒繇政拙去倍二誠宜

楚士照千乘韓梨夸數株舜門紛執玉堯岳銜分符寶

結文房友鑑明狂客湖郊圻正多壘兵會憶夷吾

兵車之會

四

鵬盡日又雪洪復作五白詩再和

天地俱同數嘉平欲盡時柳飄彭澤絮松壓大夫枝越

絕山飛洩

越有瀑布名五洩

文登石產芝

登州海上五島皆生石芝

濫騎為

郡馬深願穀相宜

日掩雲間色

李嶠詩雲間五色滿

榆栽天上林芳聯仙桂籍窮送

舊桃符遠岫明廬阜澄江接帶湖宣麻開晉國入蔡憶

金吾

裴晉公五拜相金吾謂李祐也

次韵何子應得宣城筆

金華手握管城子端類睢陽太守鬚鬚筆有神人不識

怒時真可氣吞胡

聞捷報用何韵

淮甸流離唐赤子將軍奇特魏黃鬚願將銀管書忠義
糞土東京趙與胡

不欺室三字參政張公書也筆力勁健如端人

正士儼然人望而敬之因成古詩八韵

雲山老人國大老歷代遺編旣探討餘事游神翰墨間
乘興濡毫快揮掃嚴霜烈日如魯公扶石奔泉陋徐浩
國朝君謨書第一大字劣於行與草雲山心畫无不長

筆力縱時書更好我來求字蓋求人
不為有官緣有道
紫岩之銘雲山筆不欺室中雙至寶
玉簫峰下梅花溪
願學雲山歸去早

出郊遇雪

小隊出郊聊習戰朔風吹雪似催詩
皇天有意清烽火
正類元戎破蔡時

何子應以蜀中文房四寶分贈洪景廬王嘉叟
某與焉因成一絕

江左風流屬憲臺
筆端妙語出瓊瑰
濫居益友三人列
誤辱文房四寶來

送翁東叟教授

鄱陽江上五見雪
鄱江樓上風栗烈
廣文先生不畏冷
弭棹登樓興清絕
筆端妙語出離騷
酒後剛腸吐名節
芝堂假守老鄉人
明日仙舟那忍別

三十年間舊友生
眼青頭白見交情
官於湖北况尤冷
詩不江西語自清
行李少留吳芮國
夢魂先到謝公城

扁舟便合相隨去薄有田園正可耕

和寶印叔見寄

官舍蕭條怯莫冬
衰顏得酒暈生紅
遙思蘭若堂中老
非栢非松自耐風

濫乘五馬二毛侵
雪滿鄰江坐擁衾
二叔年高兄弟遠
歸期當不待秋砧

用韵寄二弟

六月離家忽莫冬
郡堽清夜擁爐紅
細看慶朔堂前雪

正似梅花溪上風

甚矣今年老見侵玉芝堂冷敝衣衾夢魂夜夜尋兄弟
率飲堂前坐石砧

送蔡倅

白首論文得蔡侯江東尊酒半年游龍頭家世高千佛
驥足聲名重一州方喜同僚吳芮國不堪回首仲宣樓
送君撩我思鄉意薄有田園歸去休

齒落

五十行將四浮生已向殘齒疎方吐柳牙落遽驚韓猶
訝年初齒翻疑賴未丹定知從此去梨栗怯堆盤

次韵李懷安贈何憲五絕

元老登朝首剡章危言凜凜動明光掉頭却向江湖去
不肯伊優上北堂

伊洛橫渠造道深誰傳衣鉢見貞心儒宗賴有金華子
後學寧憂不嗣音

夢魂聞說到無何曾共神官壯者哦妙墨雄文滿天下

士衡應亦患才多

炙手權門盡好官
雲山高卧老江干
相期晚景全名節
富貴何須着眼看

元白詩筒數往還
小生閣筆媿言艱
異時應起鄱江念
公在金華我雁山

李懷安擁麾入蜀道
出鄱江見贈二詩依韵奉酬

不肯隨羣慕鶴軒
慨然丹陛吐危言
坐看蜀道平如地

可見忠臣勇似尊駟馬橋邊驅弩矢杜鵑聲裡擁旂旂
要須入境詢風俗首訪嚴遵李仲元

一麾出守楚東城邂逅論交媿孔程元禮仙舟行色好
子猷雪棹去心輕虎符稔服君家世雁蕩行逃我姓名
酒盞詩篇話時事江湖何日更尋盟

國娘生日

正月
二日

往歲王司業初生嫡女孫命名聊志喜曰國不忘恩日
在元正次身居輩行尊

國娘在輩行中為長願如班與孟賢淑振

吾門

陳阜卿書云聞詩筒甚盛可使流傳江西否戲
用竹萌韵以寄

江西大帥本仙官餘事篇章過定安欲遣詩筒寄詩伯
恐嫌白俗孟郊寒

次何憲韵

毛穎神明更好鬚飛騰入月跨蟾蜍誰將銀管為封邑
端為金華妙簡書鳳翥龍蟠文未稱

逸少止以
字畫名世

日光玉

潔字還疎

退之自謂不善書

何如今代何平叔筆陣詞源總莫

如

金華先生有奇石名碧遠攜來自蜀陳洪州以

詩覓之金華輟所嗜以贈亦一段奇事也予家

雁蕩羣峰錯峙皆几案間物因和二公詩頗起

鄉思寓意斷章

二公心古貌清癯趣在林泉世味疎寸碧來從錦江遠

九疑分向錫山居

碧遠峰本自九疑山得之山形中聯翩具九疑之狀陳錫山人也

丘壑奴金谷筆下波瀾
石渠我有千峰藏
雁蕩擎天

一柱挿空虛

天柱峰在雁蕩最為奇絕

嘉叟宗丞得郡喜成一絕

邸報初聞見姓名
甘棠家世舊專城
伯魚詩禮趨庭處
五馬旌旗夾道迎

人日雨次何憲韵

元正作佳天涉七弄春氣好
雨亦知時綠波行何濟
新詩如蜀州句有梅柳味
七升年定豐一石公當醉

子應贈蜀中石刻十卷詩以謝之

金華石刻滿西州不惜明珠輒暗投詩泣鬼神追雅頌

義深君父妙春秋

公有答春秋書深取左氏義深君父

隨身連軫崔評事

揀架懸籤李鄴侯掃室焚香讀終卷光芒萬丈照螺洲

次韵嘉叟讀和韓詩

孔孟久不作况雄莫能和韓公生有唐力欲拯頽挫文興八代衰學救諸子過佛老蔓中華微公衽其左餘事以詩鳴語險鬼膽破汗瀾高駕天捷敏劇飛竒騎龍歸

帝旁玉簡人間墮汗流籍湜輩圭璧分半箇柳和詞擬
騷郊聯語成此咸知太山仰誰繼北窓卧我本齏鹽生
久供筆硯課幽香摘天葩光艷拾珠唾後公三百年杖
屨無從荷世無六一翁孰知珍古貨巴詞擬陽春僭竊
罪宜坐神交有吾宗涉世同坎軻學繼青箱王詩高碧
紗播勉令添和篇才薄知何奈謬同赤效白深媿愈知
賀世事置勿論蚊睫蟲容麼

元夕次何憲韵

火樹銀花遍九衢
天移星斗下空虛
心憂機婦寒窓士
詩句分明似諫書

鄱陽燈火類殘星
風雨那堪更滿城
為郡何如在家好
長檠不似短檠明

送何憲行部趣其早還

九郡飢民望使輶
陽春有脚不辭遙
更須速返鄱君國
莫遣詩筒久寂寥

種金沙花戲呈景盧

春光駘蕩楚天涯
李白桃紅次第花
未向名園看鉄樹
聊於郡圃種金沙

郡圃栽花

公餘吏隱不相賒
杖履園林賞物華
五柳宅邊誰種柳

百花樓畔謾栽花

郡圃有百花樓

池塘有夢吟春草

永嘉有夢草堂

屏

障無心戀綺霞

綺霞亭

來歲遊人應詒我
雁山深處老桑

麻

二月朔日同嘉叟蘊之訪景廬別墅用郡圃栽

花韵卽席唱和

鄱水芝山四望賒雨餘風物倍光華
名園種果仍脩果妙手栽花似判花
行見晉公開綠野聊從子美酌流霞
坐間賓主皆人傑我質如蓬賴倚麻

野處名園境界賒夷堅博物似張華

景廬作夷堅志

參天先種

柳州柳

園中新植柳

照眼兼看花縣花

園與縣圖為鄰

卽席賦詩袍

奪錦論文對酒臉生霞自慚衰病陪行樂策杖登城脚

欲麻

還舍復用前韵以寄

負郭園林路不賒杖藜徐步賞韶華
芹宮地近分流水

園近于
州學

芝嶺風高送落花

園在芝山門范文正
芝山詩花落入城東

簷外梨

枝春帶雨

梨花
堂

城頭桃樹晚蒸霞

城上皆
種桃

行看共掌絲

綸美寧復丘中詠有麻

舍人兄弟皆掌絲綸和
詩有醉傍西岡學種麻

景廬嘉叟各和詩五首復用前韵

草堂相去不多賒雨後登臨喚革華
心喜淵明尊有酒
眼驚太白筆生花
來看四澤滿時水
歸見九光披處霞

是早陰雨得兩使君詩十首郡齋傳寫費川麻
至晚見日

用韵懷何卿

送別鄱江日未賒詩人相問憶金華烏衣巷口見歸燕

何如萬里橋西思浣花持節要先蘇赤子攝身未用踏
金陵

蒼霞

何頗喜仙

行將歸侍玉皇案不比少陵鞋用麻

嘉叟和詩至七篇有何時五畝成歸計來作鄰

翁伴藝麻之句甚鄉心方切復用韵

學繼初寮事業賒閉門寧悔讀南華符分興化日烘荔

室寓維摩天雨花

宗永寓居僧舍

故里君應懷北岳歸心我已

到飛霞

永嘉有飛霞洞天

休休莫莫宜閒處耕有添丁婦織麻

梅溪後集卷八

欽定四庫全書

梅溪後集卷九

宋 王十朋 撰

詩

州宅十二詠

平政堂

愷悌周君子循良漢守臣
如今坐堂上端是政平人

玉芝堂

范文正
公名

不是因三秀名堂意自深要居森戟地毋忘采芝心

慶翔堂

范文正
公建

昔日栽花者官移花未開舊花今豈在猶說范公栽

退思軒

會得名軒意公餘坐片時退思何及矣未退早須思

九賢堂

猶起才難歎同時九亂臣鄱陽千載守賢豈許多人

四賢堂

誰品鄱陽守四人賢不知如何堯舜世能使野無遺

四望亭

有澤宜觀水無簷不見山鄱君千里國俯仰一亭間

綺霞亭

孤鷺同飛處澄江共賦時晚來亭上看真是謝公詩

清香亭

高架添風韻芳醪共姓名蘓州凝燕寢疑是此香清

百花樓

昔日風流守公餘種百花春風不檢點紅紫落誰家

花樹

多失

都江樓

郭外山橫閣

閣山

江邊水照樓麓官無暇日何以得消憂

蜀錦亭

蜀錦海棠也郡人謂范文正公所植亭今廢

亭廢名猶在春來花自芳猶餘蜀中錦愛惜比甘棠

景廬贈人面竹杖

奔走方嗟力不任得公一杖直千金竹能有面如人面

人亦虛心似竹心渡水只愁龍欲化入山應與鳳聯吟
翰林虞部相酬贈同舍交情復見今

退之亦藤杖歌云
歸來捧贈同舍子

予與洪亦館
中同舍也

鄉人項服善宰鄱陽有政聲人惜其去用郡圃
栽花韵作詩數篇叙別遂和以送之

七歲名師世曹賒雲孫行實副文華仁心馴及魯恭雉
和氣種成潘岳花清白見知鄱水月高明相照楚天霞
送君撩我思鄉意遙想吾廬日長麻

鄱江同事半年賒直諒何人侶去華吏報園扉多鞠草

民歌枯木再生花

邑人有枯木再生春之謠

暫留蕭寺行逢雨剩作

新詩語帶霞褒德自應侯卓茂清朝知己况如麻

江東回首暮雲賒寒食令人感歲華皎皎丹心惟望日

是日祈晴

星星短髮不簪花書傳何處山名雁

寄家書

酒憶吾

鄉水似霞

樂清有赤水之名鄉人喜造紅酒

故舊相逢如問我為言多

病服天麻

公真有德如元令我媿無才似李華話別芝堂傾竹葉

送行鄱水漲桃花眼看三匝烏逢月心羨齊飛鷺趁霞
他日相期訪劉阮分桃采藥飲胡麻

予向年少不自量因讀韓詩輒和數篇未嘗敢
出以示人蓋二十年矣近因嘉叟見之不能自
掩且贈以長篇蒙景廬繼和用韵以謝

少小思尚奇薰風琴欲和規模與時背場屋屢摧挫大
道窺五原高論讀二過神遊京城南

南山詩

思渺蒸水左

竹看金影碎菊擷霜風破論文摩巨刃薦士射彊笥蕭

蘭發秋懷木雁吟齒墮飛飛雙鳥鳴不數鷗兩箇幽幽
十琴操可僕蘭臺些光餘萬丈長照我一牀卧未終三

百篇正坐短檠課

韓古律詩共三百餘篇初妄意欲盡和之以方作舉業遂止

不敢

示友朋懼遭泥滓唾文章吉太守臭味夙相荷索我舊

詩紫贈以千金貨郡丞哦好句艷艷月照坐端如陳琳

檄快讀痊臧軻濫把江湖麾謬聲慚日播祁寒兼苦雨

怨嗟吾豈奈竊效衡山禱

是日祈晴

因思鑑湖賀

時已乞祠

鵬鷗

各逍遙溟蓬無巨麼

次韵陳阜卿讀洪景廬追和玉板詩

風采稜稜御史官
旄麾所至庶民安
渭川千畝填胸臆
散作毫端風雨寒

前世書魚化宰官
肺腸元與竹相安
侯生韓子相訓贈
詩句驚人魂膽寒

次韵何憲脩途倦遊懷鄱陽唱和之樂

馬上詩成驛使馳
社中猶恨使來遲
不堪冀北羣空後
况是江東日暮時
春半鷺猶懶
呼喚雨多鳩亦厭
分離

論文尊酒何時共公說歸期我去期

次韵何憲太平道中書事

明刑親詔使行部近清明况有太平象想亡愁歎聲問
民知疾苦按郡戒將迎更向金陵看六朝餘故城

次韵何憲題魯池州通隱堂

朝市隱誠好山林通更嘉出非專為米去亦不期瓜下

惠何妨介東方未用夸

東方朔朝隱者也退之作
方朔遺事詩挾恩更矜夸

池州

知此道無媿仲連家

芝山勸農

出門非為米靈芝端為農時不可違我欲勸農農勸我
田園薄有早須歸

二月十五日祈晴十七日雷雨再作

清香一瓣乞晴回準擬陽光萬里開風伯未吹雲陣破
雷公又喚雨聲來補天石爛疇能鍊陷寧車深不易推
誰坐黃堂稱太守深慚無術抹天災

喜晴再用前韵

天閔斯民意已回羣陰不掃自應開扶桑曉日瞳瞳出
玉宇清風習習來水綠漁翁聲欸乃月明詩客手敲推
秧針刺水麥搖浪定有豐年無後灾

數日天氣朝陰暮晴復用前韵

忍飢面目類顏回僅得青天半日開且願催詩無雨至
只宜送月有風來出遊偶似文昌霽待滿當為桀溺推
退之和張十一憶昨詩云君當
先行我待滿沮溺相繼窮年推
曰雨曰暘皆帝力麥苗
無害免書灾

哭何子應

藉甚何夫子文章擅美名
金華傳語寶鄒水主詩盟
心印橫渠學相門無盡甥
人間一夢覺卿月墮臺城

骭醜宜三黜飄零到九疑
忠膺黃屋眷音遇紫岩知

以公

張魏公
薦被召

共理符頻綰明刑節屢持
青天萬里蜀無復話

歸期

公作皇華使予乘郡守轡
江湖吳芮國襟抱杜陵尊
翰

墨頻揮染詩文細討論
新編棊未就楚些已招魂

何以
正月

二十二日行部方議刊
楚東訓唱集途中亡

同官會飲鄱江樓送谷簾泉二尊戲成小詩

聞說樓中會八仙
郡齋分送谷簾泉
好將投向鄱江水
共作長鯨吸百川

名郡之東門曰永平書一絕

鄱水新門號永平
永平何止一鄱城
願言廣此平天下
黎庶長無愁歎聲

主簿程同年和永平門詩再賦四絕因以贈別

迂儒政事只平平
濫守鄱陽十里城
賴有同年更同事
公餘時作苦吟聲

高唱猶嫌二謝平
偏師能破五言城
鄱人口誦新門記
已作雷門振大聲

才知端如杜下平
異時何止任專城
三年俛首栖榛棘
行作冲霄鸞鳳聲

春盡湖如鏡面平
扁舟送別古番城
相將我亦為行客
征雁來時好寄聲

送春

楊花榆莢滿天飛九十風光別我時
鳬鷺成行報公事
簿書中作送春詩

州院獄空贈知錄孫聽

把麾承乏楚邦東
獄及期年始報空
顧我自慙無德政
同僚深喜有于公

鄰江樓分韵得月字

尊酒相逢人二八
年少壯夫子白髮
明年何處更登樓

遙望鄱陽江上月

前端午一日會飲鄱江樓十有六人既分韵賦

詩又戲成短篇

佳節江樓上同僚共把杯人如舜才子名半漢雲臺詩

占城南首音叅古磬枚宜添兩學士相約訪蓬萊

韓退之游

城南詩十六首漢韞為郡得古磬十六枚

五月二十日閔雨

仲夏百穀長中沐羣龍分

俗謂是日分龍

此邦得何龍行天莫

辭勤願於呼吸間山川走風雲亟下霈然澤抃我心如焚

次韵葉樞密言別

流落江湖歲月侵九重側席念公深漢庭寬大頒綸綍
楚閣清和襍枕衾

公寓居楚東閣

大壑巨魚欣復縱虛舟積羽

可能沈乾坤整頓須元老芝崩柯山未許尋

公前欲居芝山今暫

居柯山

洪景廬以郡釀飲客于野處園賦詩見寄次韵

老境厭吏事歸心遶丘園日月忽有夏炎蒸變春溫芝
堂孰新釀誰共論文尊緬懷蓬山舊情好素所敦殷勤
十從事往掃東坡軒深杯滑琉璃不比田家盆醉吟到
高處舞月成清歡我獨坐空齋靜對忘憂萱萱多憂未
忘香清思猶昏懷君不成寐兩處一聲猿

剡紙贈嘉叟以詩為謝次韵

仁義知君學子興豈惟詞賦似相如剡溪百幅敲冰紙
換得臨池小草書

伏日四望亭分韵得月字

伏日何處游危亭蔭清樾十客同我登詩興浩然發四
簷山在眼奚用更拄笏小飲未成醺天邊見新月

次韵趙通判喜雨

政拙時時費禱求心憂赤子餓填溝一聲霹靂中宵雨
洗出江湖萬里秋

徐孺子亭

一室不暇掃心期掃天下一榻不妄設所待必賢者南

州傑出士林泉事瀟洒閉門謝弓招道合不我舍誰云
性少通得一不為寡豫章豈私交端欲重宗社漢庭無
此賢忍使遺在野文章薦天闕聘禮備車馬高人竟不
屈清風凜華夏寄聲郭有道一木難支厦肯同樊處士
聲名祇虛假鷄酒弔知音韜光老松櫟倘令居孔門行
藏似回也江西今仲舉吏事飾儒雅神交千載友丹青
妙摹寫作亭古東湖鱗鱗萬椽瓦序啗滕閣王詞偈長
沙賈佳客從公遊湖光瑩尊尊孺子真可師世途何土

直行矣浙東西鉏犁各歸把

張安國舍人以南陵鄱陽雨暘不同示詩次韵

春水平原天可拍夏日如焚天可拆哀哉農民亦良苦
厭見常暘與常雨去秋鄱陽偶中熟巨室猶言廩無穀
萬畝家輸數千斛路旁安得黔敖粥吾君罪已同禹湯
思起傅巖調雨暘暫勤千騎作南伯要使炎嶠無餘殃
又次閔雨韵

長夏蚊蠅倦驅拍忽得緘封手親拆新詩首及民疾苦

更閔鄱陽境無雨鄱陽假守仁不熟作郡端如種焦穀
胸中賸有愁千斛闔門百指顏公粥熬微好善嗤洪湯
公孫弘張湯皆薦賢好善然其人不足取也眉間和氣如時暘行歸廊廟贊
化育善人宜賞淫人殃

次韵安國讀楚東酬唱集

麾把江湖遇列仙賡酬篇什滿鄱川竇家兄弟聯珠日

廬阜峰巒夕照天

鄱陽芝山有五老亭西望廬阜晚晴則見范文正公詩試凭高閣望五老

夕陽

三郡美名俱赫赫

陳洪州洪吉州王興化

一臺遺墨尚鮮鮮

憲何紫微妙語題詩後光艷真能照簡編

安國讀訓唱集有平生我亦詩成癖却悔來遲
不與編之句今欲編後集得佳作數篇為楚東
詩社之光復用前韵

六逸中無李謫仙

前集恨不得公詩為六

詩筒忽得舊臨川

舍人前治

臨川乃鄰郡也

枝芳又類燕山桂

何卿往矣今集又得五人

馬立欣瞻刺史

天

五人二守

公似虞臣宜作牧我慚鼠技濫烹鮮新詩不

減顏公詠貴若山王定不編

次韵安國讀薦福壁間何卿二詩悵然有感

金華遽作鬼中仙歎息真同子在川何遜詩猶在東閣

杜陵家不上青天

何卿每有歸蜀之念既死其子以其喪歸葬于吳

忠隨秦疏

留丹闕字落禪房照碧鮮客過楚東吟楚些唱酬新集

定須編

五月二十五日餞安國舍人于薦福洪右史王

宗丞來會坐間用前韵

尊酒相逢半八仙鬢絲我類杜樊川江東渭北四方客

張淮西洪江東楚尾吳頭五月天蓮社濫陪陶令飲兵
王河北集浙東

尉聊擊陸生鮮待將紅藥翻階句別作番陽一集編張欲

盡和楚東唱
酬詩故云

再用韵送安國

辟穀留侯早得仙慶鍾苗裔福如川少年為佛魁千佛
今日生天作二天西掖代言詞俊逸東湖題壁墨澄鮮
題此行定有詩千首莫惜因風寄數編

易芝山五老亭名曰五峰安國書之因成短篇

三秀呈祥處危亭壓衆坡眼驚廬阜近峰類夏雲多喬
嶽神咸會蒼穹頂共摩挲微新鐵畫輝映楚江波

次韵安國題餘干趙公子養正堂堂張魏公所

名也并為作銘

去歲西來路偶同

去六月予赴番陽魏公罷相來餘干邂逅于此饒水南僧寺

一言

不肯話飄蓬

公所言皆國之大事

銘成養正首示我

公以七月朔日至餘干某

訪公於趙公子舍公以病不及見出堂銘藁見示

室坐不欺深念公大盜欲纏

遙拱北羣言交亂卒居東可憐未戰身先死貫日精忠

化白虹

次韵安國題清音堂

堂上清音樂奏仙洲如孤嶼媚中川餘干遙服三苗國

陸羽高飛百越天

有陸羽煮泉亭時湖廣寇賊未平故借用舞干意

風過琵琶

聲不斷水來雲錦色長鮮留題重遇張公子又入詩中

第一編

唐張祐詩在於越題詠中為首篇

郡齋舊有假山暇日命工葺之取石之嵌者絳
置山頂汲水甯竹引而激之自頂而下有懸崖

飛瀑之狀予既以瀟洒名齋因鐫二字于石戲
成古風

山從何來石無根水從何來山無源忽然幻出如自然
羣峰率律聲潺湲石工貌愚性機巧兩手頃刻成陶甄
坐移野景到城郭解使平地生林泉香爐瀑布名天下
雁蕩龍湫更瀟洒名山不見典型存得趣何須論真假
君不見晉公元勲兼盛德綠野堂前羅澗石又不見行
行正直韓退之汲井埋盆成小池二公胸中有佳致澗

石盆池聊自戲世間萬事皆戲耳何止茲山與茲水

梅溪後集卷九

欽定四庫全書

梅溪後集卷十

宋 王十朋 撰

詩

予自饒易變以七月九日行饒人遮道挽留易
輜由間道而去提點何德獻相追不及以詩見
寄云斷橋截鐙亦堪憐始信林間別有天微見
兵機第一義朱輜暫席廣文氈因次其韻

誤辱鄱陽士庶憐閉門不許出朝天

門名

間行雖乏相如

壁得句全勝子敬羶

同官酌別

無德於民愧冠袍斷橋留我荷鄱人同僚送別四十里
滿酌不辭三數巡

途中寄何德獻

邂逅江湖兩白頭公方東駕我西游韓張呼酒情雖重
孔李通家好未修慶朔詩高魏提點秋香賦愧范饒州

驛筒從此相來往別後何妨却倡酬

范文正公守饒時魏郎中兼作提點

二公甚相得文正改知潤州魏作慶朔堂
裁花詩寄之文公嘗為魏作秋香亭賦

宿何山孫氏竹軒觀張安國題壁因用其韻

往來真箇及瓜期

去來皆七月

見竹還思種竹時

邵齋種竹

今日

賦詩添舊集明朝不是楚東詩

望廬山懷番易同官

五峰亭上同登日遙望廬山在杳冥今日廬山真滿眼
回頭却望五峰亭

夢觀八陣圖

是夜宿章田

易任夔子國身猶在重湖夢魂輒先往臨江觀陣圖奇
才蓋三國壯志吞兩都惜哉功不遂英雄為歛歛胡為
恍惚間微茫見規模清時恥談兵武侯其戲予

讀喻叔奇送行六詩

番禺同事九十日尊酒相呼恨不多送別六詩詩似杜
絕勝劉子竹枝歌

都昌道中望廬山思故鄉

肩輿終日在山間忽見廬山憶雁山我亦無心入蓮社
願隨征雁及秋還

過五柳灣

出守江湖日念還又扶衰病入巴山不能早作歸田計
愧過淵明五柳灣

宿栖真寺

林間古剎號栖真高躅難尋晉宋人我正迷途倦奔走
何繇來向此栖身

懷番陽士民

來去番陽各有因，却疑行止亦由人。
此心可鑒惟天日，公論難欺有士民。

觀淵明畫像

蕭洒風姿太絕塵，寓形宇內任天真。
絃歌只用八十日，便作田園歸去人。

題翠軒

淵明舊隱名棲真，中有棲真閒道人。
廬山咫尺脚不到，

開軒種竹清且新我到山中越三宿似與道人緣分熟
皇恩若許歸故鄉拭眼重來看脩竹

寓栖真四宿時二兒寓上庠未知去留又祠命
未下頗以為懷

白帝知何處黃山且少留

地名上
黃山

心慙陶靖節政愧范

饒州桑下越三宿江邊將半秋家書及祠命何日解吾
憂

望大孤山

湖口羅家渡中流見大孤山世俗以孤為姑以澎浪
為彭郎遂有小姑嫁彭郎之語東坡戲見于詩番陽
有童子渡渡頭有小山如冢世傳為九女冢見于圖
經其事甚怪蓋亦世俗流傳之訛遂以二渡所見戲
成一詩

番陽古渡留遺冢湖口烟鬟露淡粧九女何由從童子
兩姑那肯嫁彭郎

題湖口驛

蘆花洲渚江人邦
我來把酒臨西窗
五祖六祖山照眼
清流濁流水同江
孤山大小各蘄絕
鍾石上下相舂撞
千帆出沒烟雨裏
何如鷗鷺飛雙雙

至江州

遙與齊侯會
江人故國存
夷吾嗟不見
北望是中原

和叔奇見寄

荔子黃甘豈不香

二物夔州所出

路經九折歎王陽
羨君松竹

吟哦處
橘在懷中
母在堂

讀趙果州詩

名不拙時為
江州添倅

眉宇胸襟兩不塵
唾成珠玉更清新
惜哉不使蘇仙見
題品寧先趙德麟

讀王文正遺事

太平宰相王文正
盛德真宜有子孫
舊國今餘幾喬木
三槐陰滿宋乾坤

題庾樓呈唐守立夫

遙望香爐氣欲烟
坐觀湓浦浪春天
山川滿目古今迹

雲水千帆名利船萬點白鷗家浩渺一聲赤壁酹嬋娟

唐命妓歌
赤壁詞

詩篇細讀張耘叟倚遍闌干思黯然

宿太平興國宮

此來端不為行春

未至宮七里有地名行春亭

欲向廬山訪隱淪聖

主如容食祠祿願為主管太平人

九天使者號真王聖治峰前古道場五百年間聖君出

太平治效過明皇

自開元至今
蓋五百年

宿東林贈然老

儒服方袍兩禿翁
兩家元是一家風
歸田我欲效元亮
結社師真如遠公
雁蕩此生看未足
虎溪一笑偶然同
清風明月處處共
寧間江西與浙東

白公草堂

廬阜雙林寺
爐峰幾瓣香
日烘烟嫋紫
敬為白公堂

蓮社

淵明修靜不談禪
孔老門中各自賢
送別虎溪三笑後
白蓮流水兩淒然

題東林聰明泉

遠公白蓮社旁有聰明泉飲此誰聰明社中十八賢堯
舜不曾飲聰明本諸天我輩雖飲之聰明不加前為愛
此水清一酌滌塵緣却恐愚此水愚名自今傳

游圓通

夾徑森森鬱老松烟霞深處忽聞鍾虎溪水隔侯溪水
馬耳峰聯石耳峰遺像人猶思後主

李後主功德院有祠堂

開山

僧不畏先鋒

僧言曹先鋒翰下江州至圓通寺僧跌坐不懼

明朝杖履山南去

噴沫飛流看玉龍

贈訥老

路入侯溪無故侯
梵王祠宇占清幽
語言文字真吾病
喜共維摩大士游

題至樂亭

雙閣壯緇林
一亭餘古屋
庭垂祖師柏
風動禪房竹
山禽語畫寂
岩花吐秋馥
此樂本來無
行人慕幽獨

石散山形在

舊有假山石已散
失有三巨石猶存

池乾水意存
游心山水

外至樂不容言

勝書記蜀僧也和予游圓通一詩用贈訥老韻

酬

未向夔門訪武侯禪房杖履漫道幽題詩况有詩僧和
深喜廬山得勝游

次韻唐立夫以日者命狀見寄

天下名山欲徧看未能高卧愧陳搏山人誤說潛夫命
只慕冥鴻不慕官

唐詩云試把流年子細看休將鵬屈
比鵬搏君家大有回天力不為區區

官作好

趙果州致羊酒走筆戲酬

十日廬山游疏腸作雷鳴對食有長缺論文無麴生清
淨似齋戒遲留欲修行翩翩佳公子憐我厭藜羹魚酒
致遠意詩篇慰西征薑新微帶糟鮓美香流罌今宵羊
踏園魂夢定須驚回首白蓮社姑作陶淵明

題訥菴

圓通訥老以訥名菴題是菴者多用禪語予以儒說

證之

休論摩詰與文殊試把菴名扣大儒君子於言端欲訥
賢人終日只如愚樂山自昔稱仁者利口由來惡嗇夫
聽法雙峰空聳耳老禪惟要一言無

石耳馬耳圓
通二高峯也

題康王觀

趣在烟霞世味輕天將廬阜慰西征且須細看康王谷
未用遙尋白帝城星子地分天上宿谷簾泉占酒中名
凌雲仙客知多少肯向風波世路行

有凌雲峯

湯泉

占得乾坤造化爐地中沸出巧工夫泉猶自作炎涼態
休說衆生垢有無

宿歸宗寺

好山無數不知名路入禪林氣更清
石鏡溪流入夜作鸞聲鸞溪臨池墨客餘風韻寺本王右軍
宅有墨池存

拭眼高僧避寵榮安得清風生兩腋紫霄峰頂望寰瀛

簡寂觀

陸修靜
道場

縈迂草徑少人行忽有黃冠洞口迎自笑荒蕪陶靖節
更尋簡寂陸先生朝真惟有壇前石流水猶餘絃上聲
欲聽金雞上金闕紫霄峰際白雲橫

陸先生善鼓琴觀
有朝暮石金雞紫

霄皆
山名

游開先寺觀香爐瀑布諸峰讀李蘇二仙詩知
廬阜之勝在是記以十韻

廬山何處好勝地有開先瀑布漱寒玉

漱玉亭

香爐生紫

烟

香爐峯

紫霄長近日

紫霄峯

黃石不知年

黃石峯

雁蕩靈湫

合

有兩瀑布

豐城寶劍連

雙劍峰

龜行似朝斗

行龜峰

鶴唳欲冲

天

鳴鶴峰

馬尾只自洗

馬尾泉

牛頭奚用穿

牛頭岩

雄詞惟太

白妙句更蘇仙寺占星流處

星子縣

橋飛月出邊碑方閱

華巖

山谷作開先華巖院記

夢已到栖賢明日游三峽歸心定決

然

予易任嬖子方力丐祠聞三峽之名愈起歸心

游萬杉院

誰栽沙苑千株柳爭似廬山萬本杉如欲歲寒長不改
更栽松栢滿幽岩

廬山三百六十所長有神光照萬杉借問山中有何寶
仁宗飛白字非凡

一水遙分瀑布餘萬杉深處散明珠不知散却珠多少

能買人間富貴無

散珠亭

飛橋

讀東坡漱玉亭詩至月出飛橋東句想像佳境有跳
入清泠中之興予至開先新橋適成因書一絕

蘇仙詩裏見飛橋欲看虹霓踏玉腰我到山中虹始見

揚輝有月印青霄

三峽橋

三峽橋邊杖履游此身疑已到夔州題詩欲比真三峽
深媿詞源不倒流

灩澦瞿唐在眼前便應從此上青天秋風脫葉隨流下
疑是十帆出峽船

五老峯

投老山林興已濃廬山欣與老人逢定須容我來同老

五老峰邊更有峰

玉淵

誰決銀河落半天飛流濺沫五峰前
山中草木皆光潤知有含輝玉在淵

宿栖賢

瀑水聲中夜不眠星河影動半天誰
云灩澦瞿唐遠只在洋瀾左蠡邊
師子吼成方外法石人叅得定

中禪

石人峰

住山五老知今古借問曾栖幾箇賢

游楞伽

涉水穿雲一徑迂朱砂峰下訪僧居鳥鳴蟬噪更幽處

中有人藏萬卷書

李公擇藏書之所

老僧元不服朱砂境靜心灰壽自遐廬阜招提三百所

只餘折桂與楞伽

有僧年八十一言廬山諸刹惟楞伽折桂不遭焚毀

藏書閣在已無書山色依然滿舊居留得婦人三墨竹

金鍾聲裏尚扶疎

鍾樓有李夫人墨竹公擇女兄山谷母也

游南山入康谷以不觀谷簾泉為恨南康李守

致上尊乃此泉名也戲成一絕

不飲谷簾山水徒觀瀑布下長川使君破我游山恨
酒寄人間第一泉

石鏡溪

山中有鏡石為臺雲霧深藏未肯開別有一溪清似鏡
不須人為拂塵埃

廬山紀游四十韻

我性好山水思向廬山廬五老招我游有約芝山初茲

行適所願孰曰非天與入眼庾公樓興已先籃輿雲開

聖治峰石扣仙人居

太平興國宮有聖治峰劉仙石

香爐望烟靄淨社

觀芙蓉虎溪聊自笑天池步宜紆

天池最高不及游

半月圓通

留幽亭樂有餘

寺有至樂亭

趣如六一翁境似山環滁侯溪

賁月泉石耳供岩蔬

峰以生石耳得名

破戒戲魚酒踏園夢羊

猪賢闕得家音

二兒時在太學一日得兩書

天恩拜新除抗章復辭

免

前辭夔州今辭入對

行色仍躊躇遂作南山游首過荆林虛凌

雲入康谷臨流清可漁欲飲第一水山深足趵趵湯泉

本何來忽從龍口噓鸞溪尋故家

歸宗寺本
王右軍宅

墨沼波猶

渚石鏡不可見懸崖照誰梳尋真到簡寂入觀驚丘墟

緬懷黃與陸何處飄霞裾

簡寂觀乃陸修靜道場
有黃石公岩觀今荒廢

眼明

見飛瀑澗壑鳴瓊琚月落句思李練飛詩陋儒新橋跨

虹霓出月明蟾蜍兩州勞五馬同日傳雙魚

至開先得
唐江州李

南康書

神光照萬杉飛白留天書遙瞻星子城青山點春

鉏我行未及西三峽知何如登橋閱天險奮地輶雷車

壯哉五丁力鑿此千尺渠羣峰列耆老深淵蓄璫璣

五老

諸峰及三峽玉

古剎依朱砂穿林駭猿狙

楞伽在朱砂峰下自栖霞

寺路穿荆棘而行

萬卷已空閣三竹猶扶踈肩輿足繭卒傳詩

手疲胥佳境尚無窮雅興良已攄身隨禽往還興逐雲

卷舒重尋訥菴老細論無言予節物變炎涼遲留費居

諸在路何悠悠歸夢頻遽遽秋風雁還蕩絨封寄鄉閭

歸宗樅老言廬山有對云簡寂觀中甜苦笋歸

宗寺裏淡鹹齏予因以湯泉石鏡戲成一絕

參禪得味鹹齏淡學道忘憂苦笋甜石鏡與時為顯晦

湯泉涉世有涼炎

開先僧贈石菖蒲

結根拳石伴孤僧對我還同道眼青莫遣塵埃侵九節
會須重作玉衡星

別廬山

山北山南已徧遊又移行李向西州身如孟子論行止
心愧淵明任去留峰頂今宵應好月人間明日是中秋
天池一塔遙相送深喜浮雲為我收

題天華院

游徧廬山寺茲山亦自佳數宵緣石耳一飯為天華

中秋宿灤溪驛

瑞昌縣

半月游廬阜中秋宿灤溪祠尋元子隱

元次山舊隱

樹認赤

烏栖

吳赤烏所見之地

坐待雲開月行愁雨作泥香人應話我

身在九江西

浪士舊游處旅人今兩宵赤烏曾紀瑞銀杏敢興妖驛故

薄廳有銀杏木甚古能為妖伐之遂息

照眼水名灤回頭山憶堯

舊易有堯山

男兒四方志寧憚蜀天遙

瑞昌李宰贈元次山集

蒼然山色冷然聲次山之文讀可驚令君贈我有深意
欲以漫浪更吾名我雖有官真漫耳誰遣夔門稱刺史
開卷欣逢子元子尤愛清冷灤溪水

中秋思鄉用灤溪韻

今夜中秋月還應滿故溪遙知千里共深美一枝栖歲
月飄如夢年時醉似泥可憐佳節裏兄弟各東西

宿多福院

古刹名多福初來宿上方蜂窠懸敗壁燕壘滿空梁
蝙蝠沸盈室塵埃堆滿床香燒數炷柏移下小僧房

昨日飯金城觀今日飯石田驛

城縱是金非願得田雖有石尚堪耕欲隨秋雁蕩中去
却向杜鵑啼處行

瑞昌永興道中作

瑞昌屬江州
永興屬興國

蜀道青天手未摩有興從此上危坡

過瑞昌縣數里有
關子嶺關自番

場三山
方有嶺

永城朝過路方永

永城驛名在兩邑之界

多福夜眠僧不

多岡畔泥深愁欲雨渡頭舟小喜無波

黃岡橋為水所注以小舟渡

青山滿眼森高木正為人稀免斧柯

宿真如寺

在興國水南山名漂泉有御書閣

迢迢脩嶺踏朱紅

朱紅嶺

林壑深藏古梵宮一閣摩雲鏤

宸翰神光長照大江東

白帝孤城在何許遙想西風急砧杵我行初至漂泉山

御書閣下眠秋雨

至興國軍

舟中作

一宿真如飲滌泉鍾聲催上渡頭船

渡名南市有十里湖

夜來一

雨湖光好擬把窮愁洗富川

近涵州郭遠連天明月清風不計錢欲比西湖及西子

品題須喚舊蘇仙

題懷坡閣贈王景文國正

名質

窮途喜見富川波已覺茲行所得多杭潁西湖堪鼎足

兼懷六一與東坡

眼中十里是烟波
天遣江山助予多
自是玉堂揮翰手
不應此處久懷坡

贈陶永州

名安泰

雲作愁天風怒號遙瞻白帝夢猶勞
口吟太白路難蜀

心慕淵明人遇陶富水已厭家食久

陶本黃州人今居興國

浯溪

行看石崖高人生五馬何曾貴
堪嘆相逢各二毛

次韻王景文贈行四絕

聖主龍飛白首郎
誤蒙親擢與南牀
言多妄發汲長孺

心不敢邪蘇世長

天涯行客正悲秋况向鶻孫愁處愁

其中有山名鶻孫愁

歌聽竹

枝劉刺史詩懷慶朔范饒州

吾道從來自不孤果蒙好語慰榛蕪孜孜相勉惟名節

官職何須校有無

君年方壯我顏蒼敢以宗盟論雁行孝子忠臣公論在
送行詩似少陵章

題謀野堂

興國江山似杭之西湖謀野堂在州宅富於觀覽予

赴夢門張使君開燕登堂賦詩

張名采

滿目江山富一堂公餘身在水雲鄉
遙岑更作有無色西子為誰濃淡粧
荷有香能清燕寢纓無塵可濯滄浪
使君坐此謀何事境靜心清百慮忘

聞詩聞禮不赴秋試以七月二十五日離太學

八月二十六日至興國軍喜其來也因作是詩
不將蝸角與人爭走侍雙親蜀道行免為家書憂子美

飽聞情話說淵明一名所得知多少萬事真宜審重輕
更願相隨且歸去田園薄有要同耕

途中遇雨

夜宿佛圖市曉穿山障中泥愁行滑滑雨厭落濛濛晚
稻短長熟野花深淺紅江西又湖北馬首幾時東

宿大冶縣

隔岸呼舟子湖山日欲曛人家數點火風物一川雲小
渡漁人占中流縣界分秋深山驛冷蕭瑟夜深聞

東方寺

漢東方朔隱居之所唐僧智印師道場山頂白蓮池

大治迢迢接武昌西征踰月到東方白蓮智印蟠桃朔
仙佛同歸一道場

宋武帝廟

在大治縣鐵山

規模仍舊晉乾坤遺恨于今失所尊廟食鐵山精爽在
鑄兵思欲定中原

宿武昌縣

行盡江西路初乘湖北舟荒城嘆權皓

孫權與皓嘗都于此

賢令

惜韓歐

韓退之父仲昌歐陽公曾大父郴皆為武昌令

漫浪無元叟崢嶸有故

洲神仙雪堂客幾度絕江游

游西山寺

好山遺恨恐他年冒雨登臨興浩然避暑離宮閔吳主

本吳王避暑宮

橫舟巨浪壯蘇仙秋聲蕭瑟松風閣岩乳清冷

菩薩泉山半有亭名可易漫郎尤惡曲并圓

山腰有九曲亭

遇雨兩宿縣驛

絕巘笙簫斷鄰州鼓角聞江淮兩岸雨吳楚一天雲有

驛聊堪尅無尊亦自欣西山逢老宿往事說三分

吳大帝廟

故安樂宮也樊山郎山形如八字鄂渚亦有八字山

樊山八字形長在漢鼎三分國盡墟安樂故宮猶廟食
遺民時薦武昌魚

望黃州

肩輿萬松嶺鼓楫蘆花洲忽見江上山人言是黃州懷
人望雪堂讀記思竹樓二豪不復見大江自東流

過樊口

短棹經樊口高人憶漫郎杯湖誰復泛退谷自深藏鄂渚風烟接吳宮草樹荒遺音聞八曲大小兩回傍

宿華容寺

古剎何年有傳聞貞觀初藥痊明主疾鼠福梵王廬帝

賜褒嘉札

以上事見武昌土俗記

神留吉利書

殿柱有側書吉利二字人相傳以為

天書

殘僧三四輩朝暮自鐘魚

朝離華容暮宿孟橋小店甚陋得莫漕子蒙書

以八百料船見借遂可鼓楫而西矣

曉發華容寺雲開鄂渚天秋深餘晚稻地曠闢閒田草
市魚多骨荒村店有烟計臺書報我已具濟川船

至鄂渚泊報恩寺

跋涉經江夏悲涼忽暮秋雨登羅漢閣

寺有五百羅漢閣可以觀覽

醉上庾公樓

諸公會食總司既罷予獨坐南樓

風急將吹帽江寒更泛

舟川塗元不隔歸夢到東甌

題一覽亭

在漕臺後山

危亭頂鄂渚欲上初不敢肩輿躡崢嶸眼界驚坎窞青


山繚江湖烟雨抹濃淡千帆破滄浪萬室昭菡萏大澤
胸可吞秀色手宜攬形勢控上游天險卦倂坎登臨迫
吹帽秋聲在葭莢銜杯情有欣懷古意多感兩雄孫與
劉壯志鯨鵬噉赤壁走阿瞞功業炳鉛槧黃鶴去何之
靈竹色猶慘樓餘庾公興洲遺正平憾北望舊中原激
裂壯士膽何由登太山一快天下覽

赤壁之說有四在
鄂之蒲圻者是孫

權遣周瑜與劉備
併力敗曹公于是

莫漕以尊羹薦杯

蕭瑟秋風送雁回夢魂終夜遶蕭臺
年家知我鄉心切
斫鱸羹薦酒杯



梅溪後集卷十